

# Per dretg e giustia

Giusep Nay vegn 70

■ Ils 9 d'avust cumplenescha Giusep Nay il 70avel. L'anteriur derschader federal ed emprim president rumantsch dal Tribunal federal a Losanna è anc oz fitg preschent en las medias da l'entira Svizra. Cun sias posiziuns profiladas tar dumondas actualas dal dretg fundamental e statal, dals dretgs umans e da las relaziuns tranter stadi e baselgia s'auda el tar ils pli prominentes exponents naziunals. Er sin plau internaziunal vegn el enviadà sco expert.

## Giurist e derschader

Suenter ils onns da giuentetgna a Trun e la matura a Mustér ha Giusep Nay fatg ils studis da dretg a las universitads da Friburg e Turitg e terminà quels cun il doctorat. Sia carriera da derschader è ida pass per pass ensi: emprima plaza sco actuar da la dretgira chantunala, alura derschader districtual, chantunala e suppleant en la dretgira federala. Dasper questas activitats aveva el durant onns in agen biro d'advocatura a Cuira. Sco actuar dal Corpus catholicum e secretari da la Cumissiun administrativa da la baselgia chantunala catolica ha el mess sin via ils onns 1975 fin 85 il center catechetic per il Grischun, in institut per la furmazion supplementara da catechetas e catechets per la Svizra tudes-



tga a la Scola auta da teologia a Cuira, in post da cussegliaziun per lètgs e famiglias ed il post da la Caritas en il Grischun.

Cun 46 onns vegn el elegì il 1988 da l'assamblea federala sco derschader federal e va cun l'entira famiglia da Cuira a Losanna. Ils 2005 e 2006 presidiescha el il Tribunal federal. Durant ses presidi s'engascha el – tranter au-

ter – resolutamain per l'independenza da la dretgira federala encunter influenzas politicas e tendenzas populisticas. Bler da discurrer dat anc oz sia tesa che la maioritat – «il pievel» – na haja betg adina raschun. Dretg ha il pievel mo, sch'el sa tegna en sias decisionis vi dals dretgs fundamentals ed umans, insista Giusep Nay. Cun questa ed outras vardads na fa el betg pla-

schair dapertut. Mo per el na vai mai per plaschair dretg u sanester, mabain per dretg e giustia. El na sa lascha betg starmentar e persvada cun restar calm e tadlar, cun arguments concis e cuseggiati prudents.

## Engaschament curaschus

Per la fin da 2006 demissiunescha Giusep Nay sco derschader federal e chatta gronda renconuschienschas per sia lavur en il tribunal suprem da la Svizra.

El na sa retira dentant betg en la tur d'ivur, ma s'engascha e s'expona vinvant. Dapi 2007 è el derschader ad-hoc al tribunal per dretgs umans a Strassburg. Actualmain segna el sco coreducteur da la «Revista grischuna per legislaziun e giurisdicziun», presidiescha differentas instituziuns, sco per exemplu da curt anc la «Societad svizra per minoritads» e fa – dasper bler autre – part dal «Club Helvétique» che raduna personalitads impurtantadas da l'entira Svizra. Quel s'engascha per tematicas ch'occupeschon Giusep Nay dapi onns e ch'en oz pli actualas che mai: respect ed onestadad en las relaziuns vicendaivas, stadi da dretg, ina societad averta e sociala, unitad en la diversitat. Cun inschign e savida analitica fa Giusep Nay la punt tranter il mund da la giurisprudenza e quel da la poli-

tica e vegn stimà lunsch enturn per ses curaschi sco intermediatur nunpartischant e credibel. Dasper numerusas autras renconuschienschas retschaiva el 2011 il docter d'onur da la facultad teologica da l'Universidad da Lucerna.

Sias competenzas e qualitads umanas metta el adina danovamain er en servetsch dal rumantsch. El ha publicat l'emprima sentenzia da la dretgira federala en rumantsch e da curt è el sa mess a disposiziun sco cuseggiati giuridic per la gruppera «*Co vinavant cun il rumantsch grischun en scola?*». Ina politica da linguas consequenta per ina Rumantschia che va enavant, quai è sia devisa. La Lia Rumantscha ha renconuschi ses merits già avant onns cun numnar el commember d'onur.

Giusep Nay n'è betg mo il grond giurist e derschader, mabain er in um da famiglia, bab da trais figlias, tat da set biadis. Ed el tgira bleras relaziuns amicalas. Dapi sia pensiun stat el cun sia dunna Marie-Louise a Sartons sur Valbella, ma ha er suuttetgs en Svizra tudestga e franzosa da manaivel da las famiglias da sias figlias. Ir cun skis, turas en muntopagna, viadis da cultura sin l'entir mund e blera lectura mantegnan el fit, corporalmain e spiertalmain. Possia quai restar anc ditg uschia!

Bernard Cathomas